

欽定剿平三省邪匪方略

欽定剿平三省邪匪方略正編卷二百四十五

辛酉年

三月十九日乙未書麟長齡明亮奏言查徐添德

張允壽苟文明苟文輝李彬及戴家營各股賊

匪條合條分節據獲犯李元秀等供稱青白各

號被湖北官兵剿擊商量逃回四川臣等熟爲

計議必得乘其窮蹙之時卽在楚境痛剿當令

孫清元吉林泰等由興山一帶東面進擊臣長

齡明亮由保康至房縣一帶西面兜剿

臣書麟

帶兵自北而南旋據探報賊匪已竄至黨洋河
後隊尙在三對河一帶該處山深路險驟馬難
行孫清元吉林泰將鍋帳驟馬留於後隊令官
弁兵勇裹帶乾糧於初六日三鼓翻越山嶺約
行七十餘里馳至王家埡時天色微明遙見茅
倫山一帶賊匪蜂屯蟻聚此山約高十數里懸

險異常該匪早經占據抗拒孫清元吉林泰等
督兵勇從硯臺池仰面攻撲該匪愈聚愈多滾
石如雨兵勇被傷甚多孫清元吉林泰等當派
外委陳九思軍功辛得勝曾紹集陳紹才等帶
領竹山練勇爲一路把總楊儒首領鄭光明蔣
良元帶領竹谿練勇爲一路叅將烏爾卿額守
備孫鈇帶領宜昌鎮官兵爲一路遊擊毛秉剛

候補叅將楊安常德帶領宜昌鎮官兵爲一路
候補遊擊三福守備郭朝鳴珠爾杭阿帶襄陽
鎮官兵爲一路總管托爾托保遊擊蘇法那護
軍叅領特克星額帶東三省官兵爲一路以上
六路仰攻賊衆仍復擲石抵死抗拒官兵俱奮
不顧身併力攻打鎗箭如雨見頭敵賊匪百有
餘名倒地餘匪慌亂我兵一鼓搶上山頂立斃

賊匪三百餘名該匪抵敵不住我兵人人奮勇
由萬家壩百草坪一路追殺三十餘里沿途復
殲賊匪三百餘名突見身穿白袍一犯衆匪擁
護而行守備郭朝鳴孫欽千總薛忠全把總任
得福趕上適鎗中該匪頭顱生擒一百二十七
名口奪獲刀矛一百七十四件騾馬六十一頭
匹大小白旗十六面賊屍遍地該匪狂竄沙坪

木水坪其勢向房境之九湖坪上龕一帶時已向晚前路更爲險仄此次官兵追殺半夜一日暫行紮住當將獲犯張憲聰劉得成等交與同知王世勲訊供據稱此股係青白各號合營元帥係徐添德張允壽苟文明苟文輝李彬又有楊元帥崔元帥胡元帥不知名字我們原想要由巴東逃回四川因巴東卡子嚴緊不能偷過

只得向西南大山一帶翻越老林不料今日官兵趕上殺傷甚多鎗傷苟元帥頭顱等供以上二犯及熊黃思等四十九名當卽正法此外李文芳孫光盛等男婦七十六名口係南漳保康興山一帶良民甫被賊裹當經分別遠近給與口糧送交各該地方官妥爲安插

臣長齡明亮

發兵趕至復坪大坪一帶探知分股賊匪尙在

該處屯紮當派委叅領阿木昌阿都司王占鰲

把總黃興隆等帶領鄉勇上前誘賊臣長齡督

率侍衛塔津保等由山後抄截臣明亮督率巴

圖魯侍衛富翰護軍校巴桑等埋伏山坳該匪

一見鄉勇向前直撲阿木昌阿等帶領鄉勇佯

作奔跑誘賊追至山坳臣明亮早令富翰等安

排鎗礮齊發賊匪抵敵不住立斃賊匪一百餘

名當卽督催兵勇向前衝擊逼至山半賊衆合

成大隊捨命抗拒

臣

長齡由山後抄截前來兩

路合攻痛加剿殺共斃賊匪四百餘名餘匪爬

山亂竄四路搜擒活賊廖奎等七十六名追殺

三十餘里翻越兩重大山復斃賊二百餘名

臣

書麟查孫清元吉林泰一路自東而西

臣

長齡

明亮一路自西而東已成夾擊之勢但北面空

虛路逕叢雜恐該匪知東西俱有官兵勢必折

而北竄仍可下趨均穀

臣

書麟督率總兵德昌

等帶領將弁兵勇卽由羊义河白家坪西蒿坪

三路自北而南偵探該匪由何路竄出卽由何

路截剿查該匪等現在西南山內處處毗連川

境大山老林可以翻越之處不少誠恐情急竄

越業卽飛咨川省於邊界嚴密剿堵

臣

等復緊

蹠跟蹤不予以暇至各路損傷兵勇容俟查明
咨部辦理奏入

上命軍機大臣傳諭書麟長齡明亮倭什布曰此次
徐苟等逆在茅倫山一帶屯聚經孫清元吉林泰
等督率將弁殲擒賊匪七百餘名長齡等預派兵
勇埋伏山坳先後殲擒賊匪七百餘名所辦俱好
孫清元吉林泰長齡明亮均著交部議敘並賞給

長齡玉帶頭搬指大小荷包孫清元玉帶頭搬指
大小荷包吉林泰玉搬指大小荷包守備郭朝鳴
孫鈇千總薛忠全把總任得福見有身穿白袍一
犯趕上放鎗中傷苟逆頭顱亦屬奮勇俱著以應
陛之缺陞用苟逆是否卽係苟文明抑係苟文輝
如該逆業已因鎗身斃查明實係何人鎗中苟逆
頭顱卽行奏聞再加獎賞其孫清元吉林泰所派

六路官兵均屬奮勉如有實在出力將弁並著查明具奏酌量加恩書麟雖未帶兵打仗因長齡明亮東西兩面夾擊北面空虛恐賊匪復行折竄均穀督率總兵德昌等卽由羊义河等處堵剿現又因龍紹周一股竄入楚省帶兵前往攔截所辦俱合機宜書麟著賞給玉搬指大小荷包並發去火鑰搬指搬指套各十件著書麟分賞出力員弁又

一兩重銀牌一百五十箇五錢重銀牌一百五十
箇分賞出力兵丁以示鼓勵書麟現由羊义河取
道偵探龍逆竄至何路迅卽迎頭截擊與德楞泰
合剿若能就現帶兵勇將龍逆一股剿淨固屬甚
善但所帶兵力較單或未能卽時殄滅亦須逼賊
西竄以便德楞泰自西而東迎頭截剿可期一鼓
殲擒再德楞泰帶領之兵所向克捷最爲趨健前

因陸有仁供支軍餉安速賞給議敘德楞泰不日
帶兵入楚所有應用軍火糧餉務須源源接濟供
支無缺俾士馬飽騰剋期蕝績倘該省軍餉稍有
不敷書麟倭什布不妨據實奏請候朕酌量撥給
再昨據德楞泰奏龍逆衝破之卡係屬西密河都
司鄧興相汛地該都司或並未與賊接仗潛行隱
匿或係賊衆兵單未能抵禦書麟現在前往截擊

龍逆正可順道查辦據實叅奏

同日長麟奏言竊

臣

行抵寶雞接據楊奎猷羅

全亮陳五輯等稟報該鎮將等探知冉逆賊匪

由高橋溝東竄玉皇廟係奔留壩江口之路卽

於初十日五鼓帶領兵勇趕緊追躡午刻馳抵

玉皇廟據報賊匪竄至江口適總兵穆克登布

追剿伍懷志汝高二餘匪已赴前敵將糧臺軍

火留於江口駐候並派兵三百餘名在彼護守
見有賊匪竄近卽施放鎗礮轟擊該匪不敢衝
過當卽折向高家臺一路南奔楊奎猷等聞報
卽催兵疾馳至高家臺詎該匪復向柳川溝逃
竄楊奎猷等當卽籌商分兵三路進剿楊奎猷
率同遊擊李殿魁都司陳全義帶領兵勇從左
手山梁抄剿叅將羅全亮遊擊陳五輯劉滿貴

郭洪馬建廷都司邊奏凱把總賈玉成帶領兵
勇從右手山梁抄剿候補協領和興額部委協
領阿爾當驍騎校隆保等帶領馬隊由山溝繞
至柳川溝南面截殺申刻楊奎猷羅全亮兩路
兵勇趕至距柳川溝不遠遙見賊匪正向南狂
奔和興額阿爾當隆保帶領馬隊由溝內衝出
賊匪當卽折回搶佔左右兩山楊奎猷羅全亮

陳五輯等乘勢自山頂壓下立斃賊匪一百餘
名並有乘轎賊匪一人經帶領鄉勇之把總賈
玉成用矛戳斃將首級割下賊匪抵敵不住卽
拋棄騾馬翻上青崗坪老林佔據山梁抵死抗
拒楊奎猷羅全亮陳五輯等衝冒鎗石奮力仰
攻兵勇人八踴躍楊奎猷等一路卽由左上攻
羅全亮陳五輯等一路由右上攻兵勇極力攀

援上至半山賊匪鎗石愈緊遊擊郭洪把總賈
玉成首先搶上山梁隨後兩路兵勇一擁齊上
又斃賊匪四百餘名生擒一百餘名餘匪紛紛
向武關河一帶逃遁時已戌刻天黑林深不辨
路徑官兵暫行紮住探明賊蹤再行追剿計此
次殺賊五百餘名生擒男婦一百五十九名口
乘勢逃出被裹難民八百餘人奪獲騾馬三百

一十二匹刀矛二百七十三件烏鎗五十五桿
旗幟二十八桿訊據擊獲活賊供稱此股賊匪
再姓李姓張姓三個元帥乘輜被官兵截死者
卽係張元帥並將首級遍令各賊指認無訛當
將擒獲活賊概行正法其餘被裹俱係附近州
縣居民卽交同知汪銓訊明給與路票盤費遞
籍安業此次打仗兵勇間有傷亡容俟查明報

部奏入

上命軍機大臣傳諭長麟曰冉逆賊匪由高橋溝東
竄玉皇廟總兵楊奎猷等卽催兵疾馳分兵三路
進剿共殲擒賊匪六百餘名並戮斃張姓僞元帥
所辦可嘉總兵楊奎猷叅將羅全亮遊擊陳五輯
均著交部議敘遊擊郭洪把總賈玉成首先搶上
山梁俾兵勇等得以一擁齊上實屬奮勇俱著以

應陞之缺陞用現在冉逆潰敗餘匪向武關河一帶逃遁長麟務飭楊奎猷等趁賊匪殘敗之時卽在該處剿除淨盡勿留遺孽

二十日丙申額勒登保奏言臣接到南鄭縣稟報

有川中竄來賊匪衝突花石梁卡隘臣以賊匪

旣能衝卡人數自多且該處距漢郡不遠恐有

滋蔓遂於初三日親率札克塔爾等由司渡河

一帶向西迎剿行至平水查係高馬後股之賊
王凌高等約有五六百人近由胡家壩鐵鎖關
奔逃二十九日晚間竄近花石梁營卡遊擊王
作宣帶領兵勇剿擊斃賊數名將賊匪趕進小
溝正在追逐間詎有落後藏匿賊匪數十名乘
夜繞上山梁燃燒鄉勇卡隘猝被衝突鄉勇傷
亡二十餘名王作宣聞報趕回撲救該匪遂竄

至大坪木馬河一帶次日與高馬等逆合夥楊
遇春格布舍於初三日趕到木馬河該匪等竄
聚山巔恃險抗拒兵勇奮力攀援上攻賊匪復
敢下坡衝壓我軍鎗箭齊發斃賊四十餘名生
擒冉玉仁等三十餘名訊據供稱高馬等逆與
王凌高合夥後因官兵追剿緊急總由老林深
險處潛逃得便仍偷渡漢江等語

臣當嚴飭楊

遇春等盡力剿辦又慮該匪等東折於初五日
仍馳抵柳樹店扼截續據楊遇春等報稱高馬
賊匪於牛心河廣家店西河口等處輾轉竄匿
此一帶皆係深山密箐近又雨水連綿楊遇春
等帶兵由彭壩法慈院西河口往返分路抄截
沿途雖屢有斬獲不過零星餘孽而賊蹤無定
未能痛剿慶成因高馬股匪內有潰出餘匪一

百數十人西竄寧河督率兵勇追捕沿途或殲
殺數人至一二十人不等至河縣之老龍池所
剩七八十人深入老林慶成一面令叅將劉登
第帶兵緊捕一面卽督兵趕回西鄉與楊遇春
等協剿臣復抽撥官兵交札克塔爾副將楊芳
帶赴潘家梁五郎壩等處探蹤截擊以期合力
掃除旋又聞該匪南竄松坪白玉河五臺子一

帶現經楊遇春格布舍張鳳等帶領兵勇由天
池子西河口回軍壩分投緊剿初九日據報川
境又有賊匪三千餘人從簡池壩李子坪向北
奔羅家壩而來

臣

遂飭知慶成帶兵由羅家壩

迎頭截剿又派札克塔爾桑吉斯塔爾帶兵由
峽口楊松山旁路進剿初十日慶成帶領遊擊
張奉廷耶承誥李有貴都司酒大培行抵羅家

壩前隊兵勇擊到賊探張盛等二名訊知此股
賊匪係陳朝觀魏棒棒顏勝可等被川省官兵
剿潰三四股合爲一處竄來陝境聞

臣

督師在

西鄉一帶不敢東趨意欲北竄慶成卽率師由
廟壩雁碁一帶迎擊正遇該匪由細辛壩向北
竄至馬步官兵冒雨直前截殺斃賊一百餘人
生擒矛手十餘名官兵因與賊左右衝殺都司

吳浩陣亡兵勇內亦有傷亡賊匪竄上對面險
山與我兵相持直至夜半南折龍池場是日札
克塔爾帶兵由東面之黃連埡進發

臣

計其必

能探蹤迎剿旋據報稱探得賊匪於是夜三更
折出雙泉子離營卡三十餘里夜間大雨大霧
天明仍連綿不止札克塔爾安福楊芳挑帶
勇馬步兵勇先行冒雨進發令大隊接續而進

札克塔爾等趕抵石泉子賊已東竄遂督兵追
出三四十里至車灣坪追及賊尾該匪迎拒我
兵霧雨中不能施放鎗礮步兵持矛直前馬兵
躍馬放箭斃賊數十名賊匪翻山逃逸我軍隨
剿隨進沿途又殺賊一百餘名生擒男婦二百
餘名餘賊悉從陡壁深林扒越竄去惟黑龍江
驍騎校委叅領圖哩保先經衝入賊隊猝中賊

矛陣亡吉林佐領南金保亦受石傷正分兵趕
剿間據桑吉斯塔爾一面酌留兵勇入林搜剿
一面帶兵折回行過十數里正見賊匪四五百
人與官兵攪在一處賊勢頗猛札克塔爾率兵
馳馬衝擊維時雨勢甫止繼以大雪捫欽保墨
新親督官兵鎗箭並施賊不能支紛紛潰竄除
殺斃外又生擒八十餘名餘賊亦向左右密林

竄逸臨陣時黑龍江佐領委營總鍾福吉林委
驍騎校伊林阿奮勇殺賊均經陣亡當有鍾福
之子甲兵福常同甲兵數名護救伊父福常亦
身受矛傷吉林委驍騎校木楞泰腦受矛傷隨
後又有賊匪於山埡突出阻截鍋帳經副將劉
瑞玉福叅將薛攀恩劉維馨劉健標等帶兵斬
獲五十餘人餘匪敗退遂訊獲犯供稱我們昨

日在廟壩與官兵打仗元帥陳朝觀派矛手五百人護送家口先走陳朝觀親帶矛手七八百人在後與官兵抵敵今早在車灣坪打仗係在前奔竄之賊午間在倒水岡打仗係昨留在後拒敵之賊等語統計一日之內共殺賊五百餘名生擒二百八十餘名業據分別辦理札克塔爾現仍探蹤趕辦

臣

亦卽由柳樹店趕赴羅家

壩以爲各路策應再據穆克登布豐紳等呈報
伍懷志股匪前經被剿逼向西竄之後穆克登
布恐其仍由都督河折奔當派守備李廷珍率
同兵勇三百人於初一日潛由十字路旁進阻
其折竄東北之路穆克登布豐紳等率領兵勇
由老樹莊覓路前進該匪竄奔紅水河穆克登
布等帶領兵勇趕到該匪卽分佔紅水河兩面

山梁抵敵穆克登布豐紳綸布春三路滿漢官兵齊到卽於溝岔山梁分路奮力攻撲斃賊多人守備李廷珍聞紅水河已有鎗聲卽率弁勇從爛柴關於賊後奮力壓下該匪慌亂竄上大廣福溝山梁恃險相持穆克登布與豐紳綸布春將領等進攻愈力立時搶上山梁是日先後殺賊共計四百餘人生擒大旗手李奉辛等二

各矛手三十七名當卽正法其被脅未久之附近民人五十六名概行釋放該匪於初五日西竄鳳縣之進口關初六日復由進口關南竄莫家河穆克登布等仍在緊剿查南山迤東現無另股餘孽至冉學勝股匪節據稟報於上月二十八日由清水竄入隴州之關山旋即西竄華亭地界臬司王文湧率勇赴北面防堵初二日

賊匪竄至汴陽之馮家河王文湧率勇驟至賊
匪疑係大兵仍卽向南奔竄長麟已帶兵趕到
楊奎猷之兵亦由唐藏三岔進發賊匪轉旋無

定

臣

節次諄囑長麟嚴飭楊奎猷務須緊顧東

北向西南逼剿旋據稟報賊匪由寶鳳折竄於
初八日已由酒店梁竄出廢邱關初九日折進
碑亭寺溝等情

臣

查伍懷志股匪從前只剩有

二三百人後有剿潰之冉學勝股內零匪及各
股內剿散之賊且有高二餘孽先後竄合隨時
裹脅是以有三千餘衆今穆克登布等節次剿
殺所剩已不過二千人冉學勝股匪約有一千
餘衆伍逆等現被逼剿已出南山之西冉學勝
股匪又經南折碑亭寺溝一帶其勢或又攢合
此時長麟帶兵在於北面而穆克登布豐紳楊

奎猷等均分投趕剿所帶官兵共有萬數併
力剿洗該匪等自難久延倘該匪等由畧沔竄
來距西鄉已近臣更可隨時籌剿再南山寧陝
一帶現就寧謚已札飭劉之仁將所帶兵勇一
面嚴密防範一面趕修寨堡無使賊匪再有窺
伺所有紫陽安康一帶疊據額勒亨額汪啟慶
溥喜明等先後呈報大道河小道河四郎廟左

林溝小鎮等處時有賊匪出沒查係唐明萬會
芝秀及樊人傑分股餘孽每股爲數七八百人
千餘人不等

臣

已飭額勒亨額慶溥等實力防

堵截剿總以緊顧東北勿令竄楚並勿令竄近
江岸爲要至龍紹周股匪據報未經竄楚已南
竄大寧之徐家壩等處頃接德楞泰來信上月
三十日在大寧之長壩和岡溪追剿龍紹周股

匪斬戮一千八九百人生擒二千餘人滾崖落
水并逃散者亦不下二千餘名餘匪奔太平之
黃墩一帶現在籌剿臣查太平之黃墩緊接陝
之西鄉紫陽且賊匪被剿情急必又闖入陝境

臣現於羅家壩暫劄一面督剿西路高馬陳魏
等股賊匪一面飛探東路賊情如情形緊要臣

卽當前往相機辦理所有節次打仗傷亡兵勇

容另查明咨部辦理

額勒登保又奏言

臣欽奉

諭旨令將剿賊出力之穆克登布等應如何加恩之處分別保奏查太原鎮總兵穆克登布帶領弁兵不辭勞瘁應懇

恩賞在

乾清門行走原任副都統綸布春前因不能認真

出力經

臣

叅奏革職賞給披甲留於軍營効力

今在蒿溝及紅水河等處連次打仗聞與該兵
丁一同步行趕殺賊匪甚爲奮勉懇

皇上格外恩施賞給三等侍衛其肅州鎮總兵豐紳
帶領官兵能與穆克登布同心協力應懇

恩與打仗出力之遊擊傅廷剛一併交部從優議敘

守備劉桂林本戴花翎把總胡國安本戴藍翎

打仗實屬奮勉應懇

恩遇有應陞之缺陞用外委李占榮甲兵巴雅爾傑
應懇

恩俱賞戴藍翎以示鼓勵再查原任陝西神道嶺遊
擊邢承誥被叅以後已及二年厯隨恒瑞慶成
打仗剿賊均能勇往向前於一切差委亦均妥
協並查該員邢承誥以伊父副將邢敦行出師

安南陣亡難蔭騎都尉世職游授遊擊其世職
並未揀襲有人臣查該叅員年力富强旣知愧
奮自應量予鼓勵恭懇

聖慈將邢承誥舊襲騎都尉世職給還帶兵効力

額勒登保又奏言查臣去歲六月間因陝境各

股賊匪竄甘肅令札勒杭阿帶領官兵一千數
百名防堵河縣迤南寧羌一帶派留岱森保帶

領官兵一千數百名於褒城一帶防堵漢江黑
河要路札勒杭阿於是月二十九日因高戴二
姓賊匪竄至署陽之金池院率同將備各帶兵
丁出擊七月初一日於良馬臺一帶遇賊打仗
陣亡岱森保於褒城之長寨劄營相距有二百
餘里本屬救援無及得信後卽親自帶兵趕赴
沔縣一帶截剿途次射死探馬一人賊卽折回

南竄岱森保派令馬兵跟追數十里維時又探
報賊匪有繞出長寨南岸之信恐逼近漢中岱
森保卽連夜趕回長寨防堵旋卽患病皆係實
情岱森保實未與札勒杭阿同在一處亦無打
仗時退回之事臣不敢稍有徇隱飾均奏入

上命軍機大臣傳諭額勒登保曰此次高馬等逆與
王凌高合夥輾轉竄匿經額勒登保分飭湯魁齊

札克塔爾慶成等沿途抄截屢有斬獲其陳朝觀
魏棒棒顏勝可等股潰竄陝境復經慶成札克塔
爾奮力截擊所辦俱好高三馬五兩逆於賊匪中
最爲克悍斷不可疎縱額勒登保務當鼓勵將弁
兵勇倍加奮勉以期速殲二逆至伍懷志股匪據
稱穆克登布豐紳綸布春等連日趕剿共計殺賊
四百餘人生擒大旗手二名矛手三十七名所辦

尙好現在伍逆等已出南山之西穆克登布等又分投趕剿無難悉數殲除其冉學勝一股昨據長麟奏報業經楊奎猷等趕上痛剿殲賊數百名勢已殘敗此時南山寧陝一帶俱就寧謐額勒登保現已飭劉之仁嚴密布置防範並趕修寨堡以防賊匪復行竄入所見甚是額勒登保當隨時嚴飭劉之仁等嚴密防堵其由川竄來之陳朝觀等匪

應卽飭令札克塔爾等探蹤趕辦至所稱龍紹周
股匪經德楞泰痛剿後現在奔竄太平黃墩一節
昨經德楞泰奏報因該匪衝破湖北卡隘竄入楚
界德楞泰已帶兵赴楚跟剿想額勒登保發摺時
尙未得有此信又據奏查明剿辦南山賊匪出力
各員請分別加恩總兵穆克登布帶領弁兵不辭
勞瘁著加恩在乾清門行走綸布春前經叅革賞

給披甲留於軍營効力今既據奏稱綸布春甚知
愧悔打仗奮勉著加恩賞給藍翎侍衛總兵豐紳
與穆克登布同心協力奮勉殺賊著與打仗出力
之遊擊傅廷剛一併交部從優議敘其打仗奮勇
之守備劉桂林把總胡國安俱著以應陞之缺陞
用外委李占榮甲兵巴雅爾傑俱著賞戴藍翎又
已革遊擊邢承詒打仗勇往其所得騎都尉世職

係屬伊父難廕著加恩給還如果奮勉再行奏聞
候朕施恩至此次打仗陣亡之都司吳浩黑龍江
驍騎校委叅領圖哩保黑龍江佐領委營總鍾福
吉林委驍騎校伊林阿俱著咨部賜卹鍾福之子
甲兵福常因救護伊父身受重傷殊爲可憫福常
本有應得世職著先賞給藍翎侍衛以示鼓勵又
據奏稱前派札勒杭阿防堵沔縣迤南寧羌一帶

岱森保在褒城一帶防堵札勒杭阿陣亡時岱森
保相距二百餘里本屬救援無及岱森保實未與
札勒杭阿同在一處亦無打仗時退回之事岱森
保既經查明並無畏賊退回等情其應得卹廕祭
葬銀兩仍著照例給予

額勒登保又奏言查王延詔勾結匪徒起事實
爲首逆中最要之犯茲奉

諭旨如該犯被擒時未經受傷著額勒登保派委妥

幹員弁迅速解京

臣

查該犯王廷詔當被獲之時

只係臙肘跌傷並未有刀矛傷痕該犯狡詐性

成必須明幹大員妥爲解送方足以昭慎重

臣

現已派委隨營辦事之陝安道朱勳候補知縣

胡國棠同副將愛星阿護軍叅領三音庫積德

酌帶弁兵於初九日自西鄉押解起程並飛咨

撫臣陸有仁及山西巡撫直隸總督一體派員
護送進京以便審訊處治用昭

國憲再查陝安道朱勲明幹有爲隨營將及一年

臣

察看其人辦事又甚詳慎已飭令該道沿途

小心押解至副將愛星阿曾任護軍統領上年
以打仗出力由二等侍衛蒙

恩超陞河屯協副將臣查現在留營直隸兵僅有二

千餘名尙有副叅大員帶領河屯協副將亦係
緊要之缺愛星阿差竣之日應請

旨卽令回任其護軍叅領三音庫積德均係隨征日
久著有微勞亦卽可留京當差不必再來軍營

再查奉

命來營之少卿窩星額斐行簡卽日自軍營起程王

廷詔爲解京重犯

臣

伏思派員之外得有大員

照管更可以放心商之該少卿等亦以爲然臣卽
飭知該道將等隨同

欽差一體前進尤足以資彈壓而昭慎重奏入報

聞

欽定剿平三省邪匪方略正編卷二百四十六

辛酉年

三月二十一日

丁酉

勒保奏言查陳魏等股匪衆

近惟緊貼陝西老林奔逸察其現竄路逕並據

逃出難民楊愷等供稱如無官兵追剿暫在川

陝邊界屯紮若有兵來欲由竹峪關毛峪鎮一

帶遁入西鄉

臣

因川境現有之賊惟此股人數

尙多若令竄入陝境剿辦轉覺費手此時當以

逼賊北竄爲第一要着

臣

與阿哈保等連日冒

雨帶兵兼程行走初六日未刻將至毛峪鎮忽

有百餘人手執紅旗稱爲本地團勇在旁跪迎

臣

見其隊內有三四人所持矛杆繫有藍線跡

涉可疑然又不便喝破轉致生變當令隨至營

盤領賞密諭薛大烈等嚴兵以待俟其到營擒

拏詎該匪等見有準備不敢來營卽立時狂奔

隨令阿哈保薛大烈等帶領馬步官兵分投追
捕殺斃三十餘名生擒總探馬頭周從義並活
賊六十四名訊據各犯供稱陳朝觀等現紮蕨
青壩地方派令周從義帶戰手百餘人假充鄉
勇前來探路並令擄糧周從義因見官兵大隊
到來就與衆人商量若竟自奔回恐被官兵看
見追趕莫若充作鄉勇迎接俟夜間再來偷營

不想竟被識破擒獲當將周從義凌遲處死餘
匪逐一正法查蕨青壩距毛峪鎮有八十餘里

臣

卽於五更發兵由此路進發詎該匪連夜向

竹峪關一路折竄初七日午楊家山又聞七十

五帶兵由雞猴壩追來該匪卽翻山向洪口一

路旁遁七十五於初八日由竹峪關直趨洪口

至鹽井巖趕上賊尾殺賊五十餘名生擒何春

發等男婦七十一名口奪獲牛馬旗幟刀子甚多適

臣

亦於是日趕至洪口會合探知該匪等

由永安壩錢溪河一路遁去係南江地界緣平

溪壩山水驟發

臣

一面催令趕搭浮橋一面與

七十五等會商此股賊匪向在通江南江西鄉

一帶老林潛匿該處乃其熟路自被我兵連次

痛剿先由東路截回未令竄楚今又從竹峪關

毛峪壩等處截回未令竄陝現在所剩已不及
二千人而首逆尙復稽誅且鐵溪河有路可通
西鄉亦恐由老林竄出陝境惟有同心協力分
兵在邊境兜截卽在川境剿辦惟現據東鄉縣
栢世鰲新寧縣趙華稟報近有各路剿散餘匪
兩起一有百餘人在東鄉之南壩場上八廟一
帶一有二百餘人在新寧之天池寺永興場一

帶俱乘夜潛出摸樁現派團勇堵剿未便置之
不顧至湯思蛟等賊自派託雲泰由馬家營探
剿去後至今尙未接其打仗信息今兩路重兵
全赴通南邊境東路未免空虛萬一東鄉新寧
兩起蔓延腹地又成大股亦屬可慮且樊人傑
王國賢等自從四竄之後總未得其實在下落
是以臣先派遊擊桂涵等酌帶兵勇馳往東鄉

新寧等處搜剿

臣

仍督同大隊由平溪壩過河

相機分兵兜截設陳逆等被剿情急或深入川

陝老林未便將兩路重兵被其牽綴

臣

擬於臨

期察看情形當酌留一路官兵在此截剿

臣

卽

酌帶一路官兵趕赴川東督辦兩起摸樁及湯

思蛟等賊以期全境肅清再頃接德楞額奏來信

知其由陝楚邊界追剿龍紹周等股匪衆入川

已在大寧二郎壩一帶大獲勝仗餘匪由黃墩竄去非走太平卽仍回陝境德楞泰緊躡剿辦諒不日可翼殄平此路糧運已飛飭夔州府督屬趙運供支可期毋悞奏入

上命軍機大臣傳諭勒保曰本日接到六百里奏報朕以爲必係剿賊得勝情形及加披閱不過尾追陳魏等股匪衆並未趕上與賊接仗殊屬無謂所

稱陳魏等股匪衆人數尙多若令竄入陝境剿辦轉覺費手已從竹峪關毛峪鎮等處截回未令竄陝等語竟同憂藝昨據額勒登保奏陳朝觀魏棒棒顏勝可等三四股合爲一處竄來陝境希圖北竄搶渡漢江業經慶成札克塔爾奮力截拏殺賊五百餘名生擒二百八十餘名此股賊首姓名及帶兵打仗之人鑿鑿可據乃勒保尙稱未令竄陝

明係因不能趕上賊匪又旬餘未經奏報軍情故
以此奏塞責况陳朝觀等股匪勒保剿辦多時未
能殄滅復任其闖入陝境伊卽當具摺請罪其川
陝交界邊境亦必有派令防堵之員該匪係從何
處逸出亦應一併查叅乃竟佯爲不知假詞欺誑
勒保旬餘以來在彼究竟所辦何事據稱追賊至
毛峪鎮忽有賊匪百餘人假稱團勇勒保幾至墮

其術中及窺破情跡又不悉數擒拏令其隨至營
盪以致賊匪見有準備立時狂奔實屬無能其所
稱酌帶一路官兵趕赴川東督辦兩起摸樁及湯
思蛟等賊之語伊市由川東前至川北並未痛剿
賊匪又復回至川東似此徒勞跋涉於事何益白
因接到德楞泰來信知其由陝楚邊界入川故爾
迎往川東與之會合仗其兵威勝勢希冀分功殊

不知德楞泰現已追剿龍紹周等逆入楚未能來
川試思勒保早任封圻較之德楞泰閱歷更深豈
川省零星賊匪勒保竟不能辦理必須德楞泰到
彼方能辦竣耶勒保身爲總督何因人成事若此
而摺內轉將德楞泰追剿龍逆大獲勝仗情形鋪
叙入奏並稱聞知德楞泰入川之信爲之預備軍
需更屬靦顏近日以來德楞泰一路連次將龍逆

賊匪殲獲四千餘名又額勒登保督剿高馬二逆
在西鄉境內擒殺八百餘人長麟一路將汧陽新
起匪徒剿捕二千餘人並斬獲冉逆股匪六百餘
人書麟等一路戮剿徐苟等逆斬獲一千四百餘
人各處俱獲勝仗賊勢窮蹙不日即可殄平川省
團勇築堡較他省素爲認真又無大股賊匪何以
總未見勒保辦竣一股寧不自知愧慙若似此曠

日持久賊匪何時始能剿盡勒保着傳旨嚴行申飭阿哈保係御前侍衛薛大烈係乾清門侍衛俱屬大員乃亦隨同延玩並不上緊剿賊均著傳旨申飭現在勒保既督同大隊由平溪壩過河相機兜截務當將陳朝觀等匪及摸樁之賊迅速殲擒肅清川境倘再遲延必將該督等從重治罪

二十三日

臣

長麟奏言

臣

於十三日行抵寶雞

縣究查各犯謀逆根由緣寶雞汧陽隴州鳳翔岐山與甘省之靈臺疆域毗連素有悄悄會由來已久入會之人實只燒香行善並無不法別情悄悄會教首楊生齊籍隸寶雞在縣屬以南之清水河居住平日並無謀爲不軌形跡忽於本年正月間楊生齊將寶雞縣會首王廷楊居汧陽縣會首武振關邢三德趙興宗靈臺縣會

首車舉鼎隴州會首邵宗賢岐山縣會首高文
雅梁孝鳳翔縣會首李通桂先後喚至家內自
稱爲白衣真人轉世王延楊居等均係護法因
命數造定本年三月初六日該當起事囑令王
延楊居武振關邢三德趙興宗車舉鼎邵宗賢
高文雅梁孝李通桂等各回本籍州縣糾人入
會均於三月初五日各帶家口暗抵汧陽縣初

六日在武家半山子上會齊動手並約定於初
七日卽行拔營由汧陽隴州靈臺鳳翔岐山寶
雞一帶平原地方奔竄欲乘官兵猝不及防之
時多搶糧食騾馬不過數日內卽可裹脅一二
萬人再由虢川進山雖有官兵亦可無慮並諄
囑各犯務須機密不可稍漏形跡又囑王延楊
居二犯寶雞縣係當衝途恐耳目衆多先令武

振關等將汧陽等處偏僻地方人衆約齊到武
家半山等候初四五等日再糾約寶雞縣同會
中人隨時起身趕到汧陽會齊王延等俱各允
從因要在汧陽起手是以武振關邢三德趙興
宗在汧陽縣就近糾約一千五六百人其車舉
鼎邵宗賢在靈臺隴州等處糾約三二百人不
等高文雅梁孝在岐山縣尙未糾定李通桂在

鳳翔縣託張機黃登莪范升李武李玉等轉行
糾約張機等不允並聲言入會燒香原是求福
何敢興心造反不但不肯轉行糾約鳳翔縣內
如有敢想造反之人亦必出首告官李通桂聞
言氣忿聲言汝等不從將來必將汝等全家老
幼悉行殺死張機等答以卽被殺死亦屬情願
斷不敢隨同造反並分投知會親友俱不許聽

信李通桂之言初四日卽被署鳳翔縣知縣李
師白風聞將李通桂拏獲收監其王延楊居李
善倉楊生杰張敏王義忠屈發籠李可明杜寧
王本王寬蘭三合閭樂李明王和馬師賢陳之
順李胎娃陳苟子王斌玉李家娃王重何騾子
王世明邵宗賢楊潭娃楊晚晚等尙在楊生高
家內議事等候臨期赴汧陽會齊亦經署寶雞

縣隴州知州李承道於初二日訪聞初三日五鼓帶領壯勇親赴楊生高家查拏楊生高等依恃人衆放鎗拒捕擊傷壯勇十餘人李承道喊令壯勇不許退後並令將窻門堵住不許放走一人楊生高因無路可走自行放火楊生高及次子苟娃並王延之弟王寬均被燒死餘犯冒火衝出該署縣喊令壯勇分投截拏當將王延

楊居等全數拏獲並究出岐山等縣均有會匪
暗地勾結之事飛行知會一體查拏岐山縣將
將高文雅梁孝拏獲汧陽縣亦將武振關拏獲
其餘各犯毫無畏懼仍於初五日齊集武家半
山適藩司王文湧帶兵往剿未能得手初七日
臣派委副將蕭福祿帶兵趕到四面圍攻殺死
賊匪一千餘人生擒男婦幼孩一千餘人滾崖

三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

默斃賊匪四五百人未致一名漏網臣恐各犯

糾約不止此數晝夜反覆窮詰矢口不移似無

遁飾除楊生齊已經被火燒斃仍割取首級懸

掛示衆外其王延楊居武振關趙興宗邢三德

高文雅梁孝邵宗賢李通桂車舉鼎等十犯臣

審明後卽行凌遲處死梟首懸示至被糾入夥

之楊生杰等四百三十八名亦已逐名審訊明

確取具供詞卽斬梟示其餘李文玉等二百
零二名訊係初五初六兩日在武家半山左近
被裏良民當經給與路票盤費釋回安業被獲
婦女幼孩六百一十九名口訊係各該犯妻妾
子女應一律給付功臣爲奴臣亦已札飭鳳邠
道台裴音押解省城會同兩司另造妥冊分起
解送刑部聽候部議分賞此外尙有未獲應行

緣坐人犯現已分飭該管地方各員依律查辦
另行報部並嚴飭兩司及道府各員仍一體留
心如此外尙有應拏各犯亦卽趕緊搜拏以絕
根株其但經入會並未聽從謀逆之人欽遵

諭旨無庸查辦並出示曉諭安撫良民仍於寶雞岐
山酌留官兵四百名鄉勇三百名汧陽隴州酌
留鄉勇八百名靈臺縣酌留官兵五百名鳳翔

縣酌留鄉勇五百名暫資彈壓俟應撤之時再
行議撤仍委藩司王文湧平慶道祝曾署鳳翔
道陳學穎隨時來往寶雞汧陽隴州岐山靈臺
等處嚴密稽查並督率地方各員清查叛產仍
通飭各州縣一體實力講求保甲務俾地方永
臻寧謐再此案謀逆之人均經伏法其鳳翔縣
之張機黃登莪范升李武李玉等五人當李通

桂糾約入夥之時能知大義不肯聽從並能勸阻闔縣親友不許一人附和宜加優獎

臣當經

賞給銀牌衣帽銀兩並令披紅遊街派令委員帶赴汧陽隴州岐山鳳翔靈臺等州縣傳諭居

民俾得咸知觀感查

臣

前於修築堡寨案內奏

明凡鄉總保總人等均請賞給八品頂戴仰蒙

恩允在案此案張機黃登莪范升李武李玉等持正

不阿較之鄉總保總尤於地方有益可否一體
賞給入品頂戴以示鼓勵出自

聖恩再此案失察各員已於前奏聲明另行查叅報

部外臣身任封圻未能先事覺察相應請

旨將臣交部議處奏入

上命軍機大臣傳諭長麟曰此股賊匪楊生齊等以
燒香行善爲名糾約逆黨煽惑多人又妄稱白衣

真人轉世及護法等名目希圖動聽而愚民無知
被其煽惑自罹法網駢首就戮其情節可恨亦復
可憐至鳳翔縣民人張機黃登莪范升李武李玉
等不聽糾約並欲行出首有寧被殺死斷不從造
反之語實屬能知大義該督奏請賞給入品頂戴
卽照所請行其願當鄉勇者准其充當否則令其
頂戴榮身以示勸勉今全案既經辦竣長麟務當

出示曉諭以此次教首楊生齊等聚衆謀逆一經
敗露卽至身被殲誅室家不保此內鳳翔縣民張
機等經逆首李通桂嚇逼伊等堅不允從並知會
親友俱不許聽信李通桂之言今李通桂及案內
多人被擒就戮而張機等得受銀牌頂戴上進有
階是從逆者身家立破守法者永享昇平與其聽
從邪說奚如永守正道現在教匪卽日蕩平各州

縣居民等豈無聞知今汧陽等處逆犯又無一名
漏網順逆之理本自昭然百姓等務各安分守法
勉爲良民勿受人煽惑噬臍無及如此詳悉宣諭
俾衆共知庶以覺愚蒙而安良善所有被獲婦女
幼孩六百一十九名本應一律緣坐但念各首逆
家屬或知有糾糾謀反之事其餘隨從入夥者未
必盡知且人數過多朕心實有所不忍著將爲首

已問凌遲及先經燒斃鋒屍之楊生齊王延楊居
等十一犯家屬照例緣坐其餘概予省釋此係朕
法外施仁於無可寬貸之中曲予矜全之意不得
援以爲例至寶雞縣李承道於訪問逆匪勾結後
卽將楊生齊等全數拏獲並究出岐山等縣均有
會匪勾結之事知會一體查拏尙屬留心不但失
察之咎應行寬免並當錄其功績著長麟俟該省

軍務完竣後將該員送部引見候朕加恩其汧陽
靈臺岐山各州縣於該匪等糾約多人往來勾結
漫無覺察可見平日於地方事務廢弛已極非尋
常失察可比俱應革職長麟應卽確切查明據實
叅奏俟奏到時同該督自請議處之處一併交部
臣等謹案邪匪之傳教拜會其始不過燒香
行善左道疑衆追誘民附和漸多竟至謀爲

不軌此次汧陽等縣悄悄會匪因白蓮教匪
日久未盡殄除乘機竊發仰荷

聖主如天之福得以卽時敗露將首逆悉數俘擒實
屬事機順利猶蒙

皇上憫念愚頑

申命地方大吏將順存逆亡之理剴切示諭俾令家
喻戶曉勉爲良善又以案內從犯家屬人數

過多

法外施仁免其緣坐此在遷善遠暴者固感化於不自知而鯨鯢就鰲鵠鳥懷音消弭氛祲蓋有默運於無形者矣

二十六日壬寅德楞泰奏言竊臣於初九日由洞

濱口前進探得龍逆過楚後冒雨狂奔宵夜不停連日沿途逃出難民黃魁等來營請票者日

或二三十人至五六十人不等。諷知該逆實在
畏懼官兵不敢竄出平原。總在南山老林內翻
越所經地方俱係偏僻小路。實欲疲我兵馬。聞
又分出賊匪數百。或伏於山岔之間。或藏於密
林深溝。一經趕剿。四散扒山。遙爲牽綴。我兵時
須隄防。實爲詭譎萬狀。十二日據報。龍逆由平
溪翻山走魚溪河王家山。一路有奔絲茅岡大

西河之勢查絲茅岡相距我兵計程尙有一百
五六十里卽於是夜四鼓冒雨前進十三日已
刻趕抵葛藤口據報馬鞍山濫池子一帶現有
埋伏賊匪並帶到逃出難民王廷材等五名供
稱聽龍紹周說官兵利害總要走老山裡使官
兵難走若有險要地方還要埋伏搶刦鍋帳等
語臣查看馬鞍山一帶山勢陡險兼之兩水泥

導臣當派馬瑜副將李應貴叅將馬應國遊擊

馬元等帶領兵勇由中路波魚溝迎敵囑令佔

住山勢不必深進一面密令賽冲阿溫春色爾

滾侍衛富增德慶昌蘇爾伸德楞額協領富登

阿穆騰額等帶領馬隊由允子坪米家河繞出

賊後一面派蒲尙佐副將達自祥叅將李東山

遊擊何君佐遊擊銜德英額等帶領步隊兵勇

由大團包車盆寨抄出賊右臣督率阿穆勒塔

侍衛達勒精阿總管遜得保遜擊沈洪劉彪李

應元由大士菴張家壩前進爲三路策應山頂

哨望之賊見我兵三路進發該匪恃山陡險分

路迎敵各路官兵奮勇並進直撲上山賊匪膽

敢施放鎗礮擲石如雨兵勇內間有被傷者官

兵愈攻愈緊衝冒鎗石一擁搶上立斃賊匪一

百餘名該匪敗向柳樹坪奔逃馬步兵勇趕追沿途又殺賊二百餘名擒獲馮爲棟等一百三十四名餘向東南絲茅岡逃走因山高路滑雨勢又大未能痛剿

臣

查龍逆竄徑係奔白鐵河

官渡河等處而官渡係山內行船大河連日淫雨永必大漲如果地方官將河內船隻盡行撤去該匪斷難飛越我兵趕走更易痛剿卽於已

到馬步兵內挑出強壯者千餘名臣督率賽

冲阿溫春阿穆勒塔色爾滾馬瑜蒲尙佐並侍

衛將弁等連夜跟追五更後趕至黃荆壩係官

渡場後山馬步兵勇趕到者不過三四百人賊

衆已在河沿淌水火光滿地遙見河內並無船

隻男婦大小喧嚷不已我兵卽欲下河剿殺臣

以賊衆尙有數千遂令各兵放鎗轟擊虛張聲

勢使賊不知我兵虛實緣河面寬大水漲流急
黑暗之中聞官兵殺來愈形慌亂淹斃賊匪不
計其數迨官兵陸續到來天甫黎明臣卽督率
馬步兵勇衝下時竹山縣范繼昌亦帶鄉勇趕
到尙有賊一千餘人一齊擁擠下河我兵立殺
賊一百餘名生擒謝大義等五十餘名眼見淌
渡彼岸者不過三四百人其餘均被漂沒又據

探報有賊匪一千餘名半夜已順河下走

臣隨

令賽冲阿等帶兵追至七八十里斃賊二百二十
三十名生擒劉以全等三十餘名口餘匪向橫
擔梁四散奔逃訊據獲犯馬爲棟謝大義等供
稱龍元帥說官兵追趕甚緊湖北斷存不住河
內又無船隻就令衆人淌水過河逃回四川去
他與三四百騎戰手先行淌過水深黑夜不料

官兵殺來一齊擁擠下河衝溺無數只剩幾百
人過河還有一千多人半夜裡有蔣先鋒帶領
順河下走要由平河口過河翻老林回四川去
等語訊明後均卽分別辦理臣隨令泗水者照
探河道淺處亦約有四五尺勢如建瓴臣一面
派令哨探兵勇覓過河南探查一面派令副將
李應貴叅將馬應國遊擊馬三元帶領兵勇砍伐

樹木設法趕搭浮橋適竹山縣范繼昌解運軍
米船隻到來湊搭成橋較之木植不但易架而
又便捷連夜趕搭完妥是夜據各哨探回報過
河之賊不過二千餘人已向東紙坊坪天池壩
前逃其順河下逃之賊約有一千四五百人向
白雞埡南竄其勢斷不能久踞楚省臣查龍逆
等賊股原有一萬數千人除大寧和岡溪痛剿

後竄楚時尙有六七千之衆只因官渡河內船隻撤盡得以乘夜追擊洶河淹斃加以斬擒並沿途陸續投出及逃散自行回籍者亦多事機極爲順利其有受傷兵勇容俟另冊報部辦理再查官渡河素爲船隻往來之所又係停泊馬頭竹山縣范繼昌能將船隻全行撤盡以致賊匪情急洶水溺沒者極多而軍糧又能源源接

濟各寨硿窮苦難民無不愛戴臣入楚三次該

縣辦理堵禦撫卹事宜及濟運軍糧事實力

可否將竹山縣范繼昌量加鼓勵之處出自

聖慈伏乞

訓示又臣前在和岡溪省釋各難民當交夔州府查

辦茲據該府稟報川陝難民疲憊不堪當卽捐

資搭蓋草棚分別男婦棲止日給粥飯兩餐並

各給布衫鞋襪連日清查籍址除四川各州縣
及附近陝西難民妥爲遞送回籍惟平利迤西
安康紫陽石泉西鄉南鄭一帶百姓八百餘名
口半多疲憊患病恐陸路未能清靖該署府鄭
成基署縣鍾蓮鹽大使米喬齡公捐出銀一千
二百兩並委米喬齡協同營弁僱船由巫山水
路護送至興安府交明分遣遞送回籍當經批

飭照辦併移知撫臣陸有仁札知興安府俟此
項難民到日妥爲安插辦理

同日德楞泰書麟明亮長齡奏言

臣

德楞泰於

三月十五日由竹山官渡過河跟躡賊蹤前進

旋探龍紹周等匪由天池埡南竄倘由房縣上

龕東折則均穀襄樊等處在在可通

臣

德楞泰

因卽取道木蘭坪東面截剿途次接到書麟來

信以徐張等逆有北竄房縣之勢長齡明亮等
現在木樹三坪剿辦苟逆等匪書麟聞龍逆等
被剿東面無兵堵截亦改道由白玉坪前來或
爲迎截或爲夾擊

臣

德楞泰查龍逆等隨竄之

路亦與各逆相近如果合夥是賊合而兵亦合
正可聚而殲洗或有另竄別情亦可熟籌萬全
之策當卽札覆茲於十七日

臣

德楞泰帶兵先

已趕至上龕時書麟亦已西來龍逆知上龕東面有兵不敢前來卽由新營南向紅坪而遁十

八日早

臣

書麟帶兵趕至正會晤間長齡明亮

等亦卽由灣腰樹前來彼此將楚省現有各路兵力及各股賊匪奔竄應作何剿辦情形連夜

公同熟商查苟文明等股遁入房縣之木樹三

坪約有二三千人

臣

長齡明亮從紫竹地方扼

住東北之路該逆遂向西南奔逃頃聞已由羅漢洞黎子坪竄去距龍逆不遠徐添德張允壽等匪或一二百人或數十人四出焚掠明分暗合朝東暮西近又東折興山之富陽河一帶約有三四千人總兵孫清元副將吉林泰帶兵亦折赴黃連坪一路各匪本係烏合之徒正賊無幾脅從者多一經痛剿四散分逃惟恃險鑿走

牽掣官兵爲苟延殘喘之計是現在楚省各逆
勢已分爲兩路苟文明龍紹周等逆先後所竄
黎子坪長村壩俱係一路該處逕通大寧巫山
邊界臣德楞泰擬卽帶兵就近跟追至徐添德
張允壽等逆於各逆中最爲詭譎臣書麟長齡

明亮擬各帶馬步兵勇督同孫清元等分路四
面兜剿則被擄之人勢必日漸潰散自可迅速

剪除如徐逆等已除或苟龍等逆尙未殲滅

臣

書麟卽可帶兵與德楞泰合力併辦設或苟龍

等逆入川而徐張等逆被剿窮蹙亦卽回川勢

必亦由大寧巫山而入

臣

德楞泰亦卽可就近

接辦

書麟長齡明亮又奏言竊

臣

書麟因龍紹周等

股賊匪已入竹谿峯溪向東南而來無兵攔住

是以卽由羊叉河改道偵探迎頭截擊行抵三
教堂查該處爲總匯之地一面差探龍逆賊蹤
一面飛調竹山縣范繼昌令其挑帶鄉勇一千
餘名星夜趕赴田家壩一帶以杜賊匪北竄竹
山之路臣卽趕緊由獅子崖白玉坪東赴上龕
該逆知有官兵西來折向西南紅坪遁去長
齡明亮連日由八卦廟前進原爲截剿徐逆由

羅坪折竄九道梁之路旋獲賊探管真湖訊稱

該逆聞官兵趕來已走紅坪臣等卽取道紅坪

而進途次房縣適據朝陽與隆兩寨首徐有益

陳上清報稱黃柏坪油松坪等處現有賊匪離

此不遠臣等當以賊旣就近卽應帶兵進發十

四日行至七里壩查探該處兩山陡立路逕層

疊皆一線羊腸臣等行抵譚家坡遙見賊匪節

節分路負隅恃險其路徑稍寬處又皆樹木梗

塞馬力難行臣等見賊匪在前而中隔兩大山

堽兵不能進若不設法剿辦必致日久稽延旋

將滿漢步兵健壯者挑出分帶前進仍酌留兵

力防其衝撲臣長齡帶步兵潛赴左手林內繞

出賊後臣明亮帶步兵密由右手林內抄至賊

後約以坡礮爲號兩路卽當並進官兵攀藤覓

路將近賊巢號礮一發兩路官兵齊進賊人只
知前面有兵不防後路突出措手不及卽時紛
紛狂竄我兵奮勇剿殺約有一百二十餘名生
擒七十三名奪獲刀矛旗幟二百餘件餘匪扒
山星散而逃因山勢險僻無地可以屯兵只得
仍撤回黃栢坪紮營隨訊獲犯王福基供稱苟
掌櫃大隊紮在木樹三坪幾日今山裡併苦蒼

亦擄不到因怕官兵又不敢出來聽說徐添德
在當陽河因遣人往說合夥出山等語除將正
賊四十七名正法外其餘訊係難民均給予路
費省釋次日臣等仍卽帶兵前進欲直至木樹
三坪賊巢緣前途箐林愈入愈險橫木堵塞滿
道兼之泥深沒膝竟至無路可尋隨覓得平地
寨首張廣寧等查詢路徑據稱此路老山開墾

不多不但官兵斷不能去卽賊亦不能來實無

路可通仍須由興山方可到得臣復令把總門

其貴帶兵勇四百名前往修理據回稟修至天

池寺寸節均係橫倒樹木淤泥愈深且有深溝

不能開出道路之處臣等以賊營不遠原冀入

山直搗賊巢奈路徑如此險惡不能前進實不

勝憤恨焦灼探得由木樹三坪西竄可出羅坪

東折仍至興山北竄必由紫竹再四思維我兵
惟有扼據紫竹既可遏其北竄仍可迎剿九道

梁折回之賊十六日探報該逆知我兵扼住東

北面已由紅坪西走臣等隨於十七日移營由

灣腰樹西行酉刻知德楞泰追趕龍逆敗殘賊

匪已至上龕書麟亦卽到來臣等連夜趕往已

於十八日午間會合容再行籌商具奏均奏入

上命軍機大臣傳諭德楞泰書麟長齡明亮曰此次
德楞泰追擊龍紹周股匪共計殲擒八百餘人其
落河淹斃者甚多賊衆經官兵剿敗竄至河干正
值河水漲發該縣預將船隻全行撤盡辦理甚爲
認真此股賊匪前逼大河又無船隻自投絕地若
德楞泰督率官兵迅速趕到定可一鼓殲除乃其
時兵勇趕到者不過三四百人未便下河剿殺以

致賊匪先後渡河者共有二千餘人其順河下逃之賊亦有一千四五百人各首逆俱已先行過河未曾殲獲失此機會殊爲可惜看來德楞泰將馬鞍山一帶屯聚之賊剿敗後因山高路滑雨水泥濘稍有停待使賊匪得以乘間淌渡而在河沿墮甕之男婦大小不過賊匪後隊雖經殲獲淹斃多人辦理實覺遲緩龍紹周等逆本有一萬數千人

節經德楞泰剿殺現在餘匪不過三四人向上
龕一帶奔竄勢已窮蹙剿辦自易得手若不速剿
一兩月後又成大股復難撲滅矣此時德楞泰取
道木蘭坪繞出上龕東面迎剿書麟已帶兵趕至
而長齡明亮剿辦苟逆一股因該匪相距龍逆不
遠來至德楞泰軍營現據書麟等奏報剿辦徐逆
等股並與德楞泰聯銜會商合剿情形各摺覽奏

俱悉楚境各逆龍紹周苟文明勢已殘敗卽徐添
德張允壽股匪人數本屬無多而徐添德聞已老
病無能惟仗張允壽爲之謀畫楚省並無大股賊
匪德楞泰書麟等旣稱路路有兵令賊匪處處受
敵務當實力兜截不可徒托空言卽將該匪等在
楚境悉數殲除愈速愈妙倘一時未能剿盡亦當
逼令入川俾楚境早就肅清德楞泰本屬叅贊且

係成都將軍自當追躡入川與勒保上緊剿辦書
麟長齡明亮俱係總督提鎮自應於楚省邊界督
率防堵勿令竄川之賊再行折回再竹山縣范繼
昌將官渡河船隻全行撤盡使賊匪無由搶渡辦
理軍糧亦能源源接濟著加恩賞給知州銜遇有
該省知州缺出卽着書麟奏請補用又署知府鄭
成基等辦理川陝難民捐資撫卹並分別護送回

籍所辦尙好署知府鄭成基署知縣鍾蓮盛大使
米喬齡俱交德楞泰存記俟軍務大功告竣再行
奏請酌量加恩